

獨

斷

獨

斷

二

卷

四部叢刊三編子部

獨斷序

歸來

或有遺予漢左中郎將蔡邕獨斷山陰喜其書之近古也爰命工刻之嗟乎邕在東漢本以文學見重於時而且以孝行名何失足霍奸竟罹誅殛則所謂孝所謂學者亦可知矣士君子立身一敗萬事瓦裂者可鑒也已然班孟堅有漢書而伯喈有此固足傳也若彼鈎黨諸

君子舉不賴是卒烜赫宇宙間與風霆
日星相爲悠久乃不待刻而自流衍布
濩使邕得與斯列則死且不朽而是書
雖不傳可也覽者尚當有感於斯云云
弘治癸亥孟秋之吉

賜進士第僉湖廣按察司事分巡湖北道
安成劉遜序

續斷卷上

韓氏啓

漢書

卷上

續斷

卷上

漢左中郎將陳留蔡邕撰

漢天子正號曰皇帝自稱曰朕臣民稱之曰陛下其言
曰制詔史官記事曰上車馬衣服器械百物曰乘輿所
在曰行在所所居曰禁中後曰省中印曰璽所至曰幸
所進曰御其命令一曰策書二曰制書三曰詔書四曰
戒書

皇帝皇王后帝皆君也上古天子庖犧氏神農氏稱皇
堯舜稱帝夏殷周稱王秦承周末為漢驅除自以德兼
三王功包五帝故以為號漢高祖受命功德宜之因而

不改也

王者至尊四號之別名

王畿內之所稱王有天下故稱王

天王諸夏之所稱天下之所歸徃故稱天王

天子夷狄之所稱父天母地故稱天子

天家百官小吏之所稱天子無外以天下為家故稱天家

天子正號之別名

皇帝至尊之稱皇者煌也盛德煌煌無所不照帝者諦

也能行天道事天審諦故稱皇帝

朕我也古者尊卑共之貴賤不嫌則可同號之義也堯

曰朕在位七十載皐陶與帝舜言曰朕言惠可底行屈
原曰朕皇考此其義也至秦天子獨以為稱漢因而不
改也

陛下者陛階也所由升堂也天子必有近臣執兵陳於
陛側以戒不虞謂之陛下者群臣與天子言不敢指斥
天子故呼在陛下者而告之因卑達尊之意也上書亦
如之及群臣士庶相與言曰殿下閣下執事之屬皆此
類也

上者尊位所在也太史令司馬遷記事當言帝則依違
但言上不敢渫瀆言尊號尊王之義也

乘輿出於律律曰敢盜乘輿服御物謂天子所服食者也天子至尊不敢渫瀆言之故託之於乘輿乘猶載也輿猶車也天子以天下為家不以京師宮室為常處則當乘車輿以行天下故群臣託乘輿以言之或謂之車駕

天子自謂曰行在所猶言今雖在京師行所至耳巡狩天下所奏事處皆為宮在京師曰奏長安宮在泰山則曰奏奉高宮唯當時所在或曰朝廷亦依違尊者所都連舉朝廷以言之也親近侍從官稱曰大家百官小史稱曰天家

禁中者門戶有禁非侍御者不得入故曰禁中孝元皇后父大司馬陽平侯名禁當時避之故曰省中今宜改後遂無言之者

璽者印也印者信也天子以玉螭虎紐古之尊卑共之月令曰固封璽春秋左氏傳曰魯襄公在楚季武子使公冶問璽書追而與之此諸侯大夫印稱璽者也衛宏曰秦以前民皆以金玉爲印龍虎紐唯其所好然則秦以來天子獨以印稱璽又獨以玉群臣莫敢用也

幸者宜幸也世俗以幸爲僥倖車駕所至民臣被其德澤以僥倖故曰幸也先帝故事所至見長吏三老官屬

親臨軒作樂賜食阜帛越巾加珮帶民爵有級數或賜
田租之半是故謂之幸皆非其所當得而得之王仲任
曰君子無幸而有不幸小人有幸而無不幸春秋傳曰
民之多幸國之不幸也言民之得所不當得故謂之幸
然則人主必慎所幸也御者進也凡衣服加於身飲食
入於口妃妾接於寢皆曰御親愛者皆曰幸幸說從上
章

策書策者簡也禮曰不滿百丈不書於策其制長二尺
短者半之其次一長一短兩編下附篆書起年月日掇
皇帝曰以命諸侯王三公其諸侯之薨于位者亦以策

書誅謚其行而賜之加諸侯之策三公以罪免亦賜策
文體如上策而繇書以尺一木兩行唯此為異者也

制書帝者制度之命也其文曰制誥三公赦令贖令之
屬是也刺史太守相劾奏申下土遷書文亦如之其徵
為九卿若遷京師近宮則言官具言姓名其免若得罪
無姓凡制書有印使符下遠近皆璽封尚書令印重封
唯赦令贖令召三公詣朝堂受制書司徒印封露布下
州郡

詔書者詔誥也有三品其文曰告某官官如故事是為
詔書群臣有所奏請尚書令奏之下有制曰天子荅之

曰可若下某官云云亦曰詔書群臣有所奏請無尚書令奏制之字則荅曰已奏如書本官下所當至亦曰詔戒書戒敕刺史太守及三邊營官被勅文曰有詔勅某官是為戒敕也世皆名此為策書失之遠矣

凡群臣尚書於天子者有四名一曰章二曰奏三曰表四曰駁議

章者需頭稱稽首上書謝恩陳事詣闕通者也

奏者亦需頭其京師官但言稽首以聞其中者所請若罪法劾案公府送御史臺公卿校尉送謁者臺也

表者不需頭上言臣某言下言臣某誠惶誠恐稽首頓

首死罪死罪左方下附曰某官臣某甲上文多用編兩行文少以五行詣尚書通者也公卿校尉諸將不言姓大夫以下有同姓官別者言姓章曰報聞公卿使謁者將大夫以下至吏民尚書左丞奏聞報可表文報已奏如書凡章表皆啓封其言密事得帛囊盛

其有疑事公卿百官會議若臺閣有所正處而獨執異意者曰駁議駁議曰某官某甲議以為如是下言臣愚竊議異其非駁議不言議異其合於上意者文報曰某官某甲議可

漢承秦法群臣上書皆言昧死言王莽盜位慕古法去

昧死曰稽首光武因而不改朝臣曰稽首頓首非朝臣
曰稽首再拜公卿侍中尚書衣帛而朝曰朝臣諸營校
尉將大夫以下亦為朝臣

王者臨撫之別名

天子曰兆民諸侯曰萬民

今之令長古之諸侯

百乘之家曰百姓

百乘之家子男之國也

天子所都曰京師京水也地下之衆者莫過於水地上
之衆者莫過於人京大師衆也故曰京師也

京師天子之畿內千里象日月日月躔次千里

天子命令之別名

命出君下臣名曰命

令奉而行之名曰令

政著之竹帛名曰政

天子父事天母事地兄事日姊事月常以春分朝日於東門之外示有所尊訓人民事君之道也

天子父事三老者適成於天地人也兄事五更者訓於五品也更者長也更相代至五也能以善道改更已也又三老老謂父也舊也壽也皆取首妻男女完具者古者天子親袒割牲執醬而饋三公設几九卿正履使者

安車輓輪送迎而至其家天子獨拜于屏明旦三老詣闕謝以其禮過厚故也又五更或為叟叟老稱與三老同義也

三代建正之別名

夏以十三月為正十寸為尺律中太簇言萬物始簇而生故以為正也

殷以十二月為正九寸為尺律中大呂言陰氣大勝助

黃鍾

宣氣而萬物生故以為正也

周以十一月為正八寸為尺律中黃鍾言陽氣踵黃泉而出故以為正也

三代年歲之別名

唐虞曰載載歲也言一歲莫不覆載故曰載也夏曰歲
一曰稔也商曰紀周曰年閏月者所以補小月之減日
以正歲數故三年一閏五年再閏

天子諸侯后妃夫人之別名

天子之妃曰后后之言後也諸侯之妃曰夫人夫人之
言扶也大夫曰孺人孺人之言屬也士曰婦人婦人之
言服也庶人曰妻妻之言齊也公侯有夫人有世婦有
妻有妾皇后赤綬玉璽貴人綈綬金印綈綬色似綠
天子后立六宮之別名